

S T E N O G R A M

**5. Hitne sjednice Skupštine Kantona Sarajevo, održane u utorak,
24.11.2015. godine sa početkom rada u 9,00 sati**

Predsjedavajući:

Molim vas za mir da krenemo sa radom.

Otvaram 5. Hitnu sjednicu Skupštine Kantona Sarajevo.

Pozdravljam uvažene kolegice i kolege poslanike, članove Vlade i uvažene goste, kao i predstavnike medija koji prate rad današnje sjednice.

Nadam se da će cijenjeni gledaoci Televizije Kantona Sarajevo sa pažnjom pratiti rad današnje Skupštine, te im upućujem pozdrave, a svima nama želim uspješan rad i ugodnu radnu atmosferu.

Prema evidenciji Službe, sjednici prisustvuje 31 poslanik, što je dovoljan broj za punovažan rad i odlučivanje.

Izostanak sa ove sjednice opravdali su: Neira Avdibegović i Slaviša Šućur.

U skladu sa članom 71. Poslovnika konačnu odluku o utvrđivanju hitnog karaktera sjednice Skupštine donosi Kolegij Skupštine.

Kolegij Skupštine Kantona Sarajevo je na sjednici održanoj 23.11.2015.godine utvrdio da postoji osnov za sazivanje Hitne sjednice Skupštine Kantona Sarajevo i utvrdio termin održavanja 24.11.2015.godine u 09,00.

U skladu sa članom 65. Poslovnika Skupštine Kantona Sarajevo, dnevni red za ovu sjednicu utvrdit ćemo danas.

Shodno naprijed navedenom, Prijedlog Dnevnog reda 5. Hitne sjednice Skupštine Kantona Sarajevo glasi, pod jedan. Izvinjavam se predsjednik Kluba SDA koji je bio predlagatelj dnevnog reda, ima riječ Mirza Čelik. Može mikrofona?

Poslanik/zastupnik Mirza Čelik:

Zahvaljujem predsjedavajući. Pa evo prije nego što vi pročitate, ja vjerujem da je to isti dnevni red kao i kod mene, evo ja vas sve selamim i pozdravljam. Za današnju hitnu sjednicu ja predlažem sljedeći dnevni red:

1. Potvrđivanje prijedloga kandidata za predsjedavajućeg odnosno dopredsjedavajućeg Skupštine Kantona Sarajevo;
2. Prijedlog odluke o izmjenama i dopunama Poslovnika Skupštine Kantona Sarajevo;
3. Prijedlog odluke o izmjeni Odluke o imenovanju Komisije za izbor i imenovanje i administrativna pitanja Skupštine Kantona Sarajevo;
4. Prijedlog odluke o potvrđivanju smjene ministara u Vladi Kantona Sarajevo;
5. Prijedlog odluke o potvrđivanju imenovanja ministara u Vladi Kantona Sarajevo.

To je dnevni red. Zahvaljujem.

Predsjedavajući:

Zahvaljujem predsjedniku Kluba SDA Mirzi Čeliku. Znači, shodno naprijed navedenom. Uvaženi zastupnik Pleho ima riječ.

Poslanik/zastupnik Haris Pleho:

Hvala predsjedavajući. Prije svega želim sve srdačno da pozdravim i poselamim. Klub zastupnika BOSS Nermin Bjelak je podnio Komisiji za izbor i imenovanje zahtjev za imenovanje svog predstavnika u ovu Komisiju. S obzirom da zahtjev na Komisiji nije dobio potrebnu većinu tražim da se dnevni red današnje sjednice dopuni sa tačkom čiji sam ja predlagatelj. Prijedlog odluke o izmjeni odluke o imenovanju Komisije za izbor i imenovanje i administrativna pitanja. Ukoliko Skupština prihvati da se ova tačka uvrsti u dnevni red, materijal će biti odmah dostavljen zastupnicima. Hvala lijepo.

Predsjedavajući.

Ima, samo da vidimo da li da se Skupština izjasni za o kompletnom dnevnom redu, znači shodno ove ja bih volio da se Skupština izjasni o kompletnom dnevnom redu. Ko je za ovaj dnevni red?

Dat ćemo riječ uvaženom zastupniku Kojoviću prije nego.

Poslanik/zastupnik Predrag Kojović:

Zahvaljujem predsjedavajući. Ja bih samo htio da prije nego što krenemo u ovu kako bih rekao sjednicu na kojoj se mislim događa puno stvari. Devalvacija našeg pravnog sistema, demokratskog procesa, da neka pravila utvrdimo prije nego što krenemo u ovu sjednicu. Hoćete li vi nama dopustiti da mi pričamo o stvarima koje su danas ovdje na dnevnom redu, ili mi smo ovdje samo kako bih rekao dovedeni da popunimo ova sjedala, da to izgleda lijepo za televizijski prenos. Znači ja bih prvo želio da nam dopustite da progovorimo par riječi da li postoji zakonski poslovnički i drugi osnov za održavanje ove sjednice. To što je Kolegij odlučio, ja poštujem. Međutim ovo tijelo je ono gdje leži legitimitet i kome su građani dali povjerenje. I ja zahtijevam da dopustite ovim ljudima koji predstavljaju 400.000 građana Kantona Sarajevo da kažu par riječi o procesu, o načinu na koji se vodi ovaj proces za koji ja lično smatram da nema ustavnog odnosa, nema zakonskog osnova, nema ni poslovnčkog osnova, a to što ste vi kao drugu tačku dnevnog reda stavili izmjenu Poslovnika a materijal za tu tačku nam još niste dostavili, znači pola sata nakon što je počela sjednica to je kako bih rekao jedna materija o kojoj ću nadam se više govoriti kada ta tačka dnevnog reda dođe na red. Hvala.

Poslanik/zastupnik Mirsad Pindžo:

Hvala uvaženi predsjedavajući. Pozdravljam sve prisutne kao i građane koji današnje ovo hitno zasjedanje prate putem malih ekrana. Neću ponavljati ono što je kolega Kojović govorio, ali imam jedno pitanje za predlagača. Obzirom da Poslovnik kaže da karakter hitnosti utvrđuje Kolegij, to ne sporimo. Kolegij je većinom glasova utvrdio kolega. Ali bi bilo dobro zbog kolega koji nisu u Kolegiju i onih koji sjede danas ovdje, a pogotovo zbog građana Kantona da nam predlagač odgovori šta je to hitnost u smislu člana 65 Poslovnika Skupština Kantona Sarajevo koji kaže: „izuzetno u okolnostima opasnosti po javnu sigurnost i sigurnost građana širih razmjera, elementarnih nepogoda, velikih šteta za imovinu epidemije i slično predsjedavajući može da sazove sjednicu u kraćim rokovima od onih predviđenim Poslovnikom.“ Ja bih molio predlagača da ove tačke koje je predložio da danas razmatramo, kako će one uticati na sigurnost, je li to elementarna nepogoda, je li epidemija? Pod šta se ovo može podvesti? Ja bih molio da se da obrazloženje da građani čuju šta je to tako hitno, jer izmjene Poslovnika, izmjene članova Komisija, oko razrješenja i potvrđivanja Vlade to je već druga priča. Legitiman politički ali proceduralno apsolutno nedopustiv. Hvala lijepo.

Poslanik/zastupnik Sabina Ćudić:

Zahvaljujem. Pozdrav svima. Htjela bih prije svega da obavijestim javnost da materijale za ovu sjednicu još uvijek nismo dobili. Da smo iz medija saznali o zakazivanju hitne sjednice koja je 6 hitna sjednica i htjela bih da se malo osvrnemo, 5. izvinjavam se hitna sjednica, i htjela bih malo da se osvrnem na genezu hitnih sjednica u Skupština Kantona Sarajevo u protekloj godini. Ako pogledate prve tačke dnevnog reda hitnih sjednica one se gotovo uvijek tiču imenovanja, odnosno razrješenja dužnosti, odnosno bavimo se sami sobom. Pa ako pogledate tu su izmjene Zakona o radno pravnom statusu poslanika u Skupština Kantona Sarajevo, pa radno pravni status članova Vlade, pa prijedlozi odluka o razrješenju predsjednika i članova Skupština komunalnih preduzeća, itd. Ali ću vam reći zašto nisu zakazane hitne sjednice nikada u Skupština Kantona Sarajevo u proteklih godinu dana. Hitna sjednica nije zakazana kako Poslovnik nalaže koji je kolega upravo citirao radi sigurnosne situacije. Radi trovanja djece, radi terorističkih napada, itd. Isključivo se bavimo na hitnim sjednicama kršenjem Poslovnika odnosno izmicanjem fotelja ispod nekoga i davanja fotelja nekome drugog. Iz tog razloga mislim da nam je dužno objašnjenje ako smo tu radi razrješenja dužnosti, onda nam premijer, odnosno Vlada moraju dokazati da su postojeći ministri kako nalaže citirani član, ili prijetnja javnom redu u Kantonu Sarajevo ili šire epidemiju ili kao što smo čuli koji su članovi. Dakle

mora se dokazati zašto po hitnom postupku pokušavamo kolege razriješiti dužnosti, a zašto nismo mogli čekati redovnu sjednicu koja bi naravno bila zakazana prvom polovinom decembra, odnosno mjesec dana vjerovatno nakon prošle sjednice koja je bila 07. novembra. Tako da mislim prije nego što glasamo za ovaj dnevni red moramo jasno uspostaviti koja je to prijetnja koju Kanton trpi od naših kolega.

Predsjedavajući:

Zahvaljujemo uvaženoj zastupnici Ćudić. Ako se niko ne javlja za riječ dajem riječ zastupniku Čeliku da odgovori na pitanje.

Poslanik/zastupnik Mirza Čelik:

Zahvaljujem predsjedavajući. Pa evo prvo ću odgovoriti uvaženoj zastupnici Ćudić pa Peđa Kojović je član Naše stranke i on je član Kolegija, tako da ne moramo neke stvari saznavati putem medija. I hitna sjednica kada se zakazuje zna se procedura. Karter hitnosti utvrđuje Kolegij i to nije ništa sporno i ako kolege kažu da je to sada sporno, evo mi ćemo sada iz Kluba SDA tražiti da se izjasni Skupština da li je hitnost ili nije. Da bi i to građani Kantona čuli. A razlozi za donošenje odluke za hitnu sjednicu i u članu 45 piše tamo da je između ostalog i sigurnost građana širih razmjera, elementarnih nepogoda, velikih šteta za imovinu, epidemije i slično. To slično znači puno toga otvorenog. Ispred nas je budžet i to je jedan od osnovnih razloga za današnju sjednicu hitnu. Javna rasprava je u toku, mi ne želimo i nećemo da dopusti da ide privremeno finansiranje budžeta jer je to deset koraka unazad za premijera i za Vladu. Deset koraka. Jel nama to u kantonu treba? Ne treba. I ako to nije dovoljan argument da mi danas imamo hitnu sjednicu gdje ćemo sve ove dnevni red iscrpiti i na način na koji ćemo usvojiti, usvojiti i pustiti premijera i Vladu u novom sazivu da radi i da ide u korak sa vremenom onako kako je u Ekspozeu to napisano uvaženog premijera, ja ne vidim razloga zašto onda mi sjedimo ovdje. U pravu su, mi smo tu zbog građana Kantona Sarajevo, i danas radimo zbog građana Kantona Sarajevo. SDA je dobila 52.000 glasova. Mi smo odgovorni zbog njih. Mi danas radimo ovo zbog građana Kantona Sarajevo. Ako to nije dovoljan razlog evo nek kažu još, mi ćemo danas cijeli dan odgovarati na njihova pitanja. Zahvaljujem.

Poslanik/zastupnik Sabina Ćudić replika:

Kolega, vi ste upravo pročitali dnevni red današnje sjednice, ništa se ne tiče budžeta. Budžet jeste u javnoj raspravi ali podsjetit ćemo vas 31. marta kada smo usvojili budžet za 2015 godinu se isto desio po hitnom postupku i tada nam nije smetalo što je predlagač tog budžeta nije bio trenutno već prijašnji premijer. Dakle, prilagođavate pravila datoj situaciji. Kada kažete i slično, naravno da slično pokriva kao što sama riječ slično kaže slične situacije, a ne potpuno različite situacije u kojima je hitnost smjena pet ministara i ministrica za koje apsolutno ne znamo niti nam je dostavljeno šta su prekršili i zašto bivaju smijenjeni, odnosno niti su nam dostavljene biografije novih ministara niti nam je jasno zašto se ovo dešava u hitnom postupku. Molim vas pojasnite nam pod pojmom slično kako to podrazumijeva nepogode koje su citirane u članu koje ste i sami naveli.

Poslanik/zastupnik Mirza Čelik odgovor na repliku:

Razloge za današnju sjednicu nećemo ponovo ponavljati rekli smo da je to radi usvajanja budžeta i radi toga što građani Kantona ne trebaju da idu deset koraka unazad. Evo ja opet kažem i opet ću ponoviti deset puta ako treba. A da kažemo da ovi ministri koji će biti razriješeni nisu radili u skladu sa zakonom ili Ustavom to ne možemo da kažemo. Mi kažemo da su ti ministri bili čestiti i da su obnašali svoj posao onako kako su obnašali u skladu sa zakonom i nećemo dopustiti nikada nikome da kaže da to nisu uradili onako kako su trebali da rade. Sticajem okolnosti desilo se to da po vertikali i promjena parlamentarne većine se odrazila i na kantonalnu skupštinu. Mi ne možemo danas reći da se dešavaju stvari neke u Domu naroda

onako kako je to potpisano između koalicije SDA i DF-a. Evo sami vi predsjedavajući znate kako glasate u Domu naroda. Nije u skladu sa koalicionim dogovorom. Između ostalog i to jedan od razloga za današnju hitnu sjednicu i radi samog toga nastavke javne rasprave i usvajanja budžeta za 2016 godinu.

Poslanik/zastupnik Mario Vukasović:

Zahvaljujem se predsjedavajući. E ovako, s obzirom da kolega Čelik nije precizno odgovorio na pitanje koje je postavio kolega iz Kluba DF-a Pindžo, ja bih samo zamolio, s obzirom da Poslovnik ne poznaje pojmove kao što su promjena vlasti po vertikali itd. da se tačno navede šta je to opasnost po sigurnost, i šta je to opasnost epidemiološka ili neka slična koja je navedena u Poslovniku, bez priče o budžetu ili nekim drugim pričama. Znači tačno šta je to u skladu sa Poslovnikom na osnovu koje je sazvana ova sjednica. Hvala.

Poslanik/zastupnik Goran Akšamija:

Zahvaljujem predsjedavajući. Pozdravljam sve prisutne gledaoce medija. S obzirom na ovo izlaganje koje smo maloprije čuli a s obzirom da je ovo karakter hitne sjednice gdje se stvarno donose ovako važne uloge i dešavaju ove stvari, meni bi stvarno onda bilo drago da ne idemo tih deset koraka unazad nego da idemo deset koraka naprijed, pa predlažem na današnjoj sjednici da dodamo još jednu tačku dnevnog reda, jer se vidi stvarno da je to jedna velika hitnost, da će Kanton doći u totalnu propast pa ako možemo danas da idemo i sa usvajanjem budžeta. Hvala.

Poslanik/zastupnik Bibija Kerla:

Pozdravljam sve prisutne i hvala na odobrenju. Ja samo da pitam gdina Čelika je li on bio na zadnjoj sjednici Skupštine kada je lično premijer Skupštine Kantona Sarajevo rekao da je prvi put u životu doživio da i opozicija i pozicija usvajaju nacrt budžeta. Znači mi ćemo vjerovatno biti za budžet ali on nije danas na dnevnom redu. Hvala lijepo.

Poslanik/zastupnik Predrag Kojović:

Zahvaljujem predsjedavajući. Ja pretpostavljam da je namjera da mi iznesemo svi svoje frustracije koje ćete vi mirno saslušati, odgovoriti ovako neadekvatno kao što to radi kolega Čelik i onda preći na glasanje, imate 18 ruku i idemo dalje. Međutim samo sam htio da vam skrenem jednu pažnju. Nije ovo što se radi to nije dobro, pazite. Čak ja stvarno mislim da premijer treba da ima pravo da smijeni određene ministre iz raznih razloga, nije zadovoljan njihovim radom, pa čak uvažavam kako bih rekao biznis u kojem se mi nalazimo, koji se zove politika, ovo o čemu govori gospodin Čelik formirana je nova parlamentarna većina, treba izvršna vlast da je reflektuje. Znači sve je to ok. Međutim podsjetit ću vas u Reformskoj agendi koja je postala neka vrsta zakletve ovdje, svi smo za Reformsku agendu, u odjeljku broj 12 zove se vladavina zakona naš problem u posljednjih 20 godina je što imamo vladavinu političkih lidera i vladavinu političkih partija a nemamo vladavinu zakona. E sada, imati ideju da ćete kršenjem zakona postići ovaj cilj koji je zacrtan u Reformskoj agendi, je infantilna ideja. Mislim generalno vjerovati da će ista vrsta ponašanja proizvesti drugi rezultat od ovoga u kome se sada nalazimo je neozbiljno. Nije dobro promišljeno. 20 godina mi radimo ovo što vi radite danas. Vršimo pravno nasilje, ne mijenjamo loše zakone nego ih zaobilazimo i tražimo neke druge načine da ostvarimo svoje dnevno političke ciljeve. I sada kada smo zacrtali da nam je cilj da u periodu 2015 -2018 u BIH uspostavimo vladavinu zakona ovo je početak načina koji to radi nova parlamentarna većina. Ali kao što kažem, vi ćete naravno ovo saslušati. Mi kolega Čelik, ja ne znam kome se vi obraćate, ja ne mogu da zamislim koji je to nivo inteligencije koji bi prihvatio ovaj ovaj vaš odgovor kako bih rekao racionalan odgovor, na pitanja koja mi postavljamo. Ja sam, mi smo radili zajedno na izmjenama poslovnika. I vi znate da sam se u toj radnoj grupi ja zalagao da se koncept hitnih sjednica promijeni, da se dopusti da razlog za hitnu sjednicu bude i ovo o čemu vi pričate. Izradili smo nacrt Poslovnika i on je sada u javnoj

raspravi i mijenja se. Ali ne, vi idete danas na izmjenu ovih odredbi poslovnika koje vama smetaju, materijal koji još nismo dobili, ja ne znam, ne razumijem šta vi očekujete od nas. Da nam pokažete to što ste vi smisli u svojoj stranačkoj centrali i da mi u roku od 30 sekundi to pročitamo i glasamo za. Ili ono što mene još više brine, vi ne očekujete uopšte da mi glasamo za. Vi očekujete da mi glasamo protiv. Zašto? Jer vi imate brojeve. A o tim brojevima, ja ne znam dal će me predsjedavajući prekinuti ja neću da otvorim tu temu, ja ću pričati i o tome kakav je na koji način ste vi formirali tu parlamentarnu većinu o kojoj vi govorite. Kršenjem zaključaka ove Skupštine davanjem poslanicima pravo učešća u rukovodstvima javnih preduzeća i institucija, iako ima zaključak Skupštine nakon februarskih demonstracija prošle godine koji to zabranjuje. To je ono što karakteriše vladavinu svake izvršne vlasti, parlamentarne većine u kojoj je dominirala SDA 20 godina i ona nas je dovela ovdje gdje jeste. I ovo što radimo danas je samo kontinuitet te vaše politike a vi pri tom očekujete da će ovo imati neki drugi rezultat od onoga koji je imao posljednjih 20 godina.

Poslanik/zastupnik Mirza Čelik ispravka krivog navoda:

Pošto smo zajedno mijenjali Poslovnik ja ću samo ispraviti uvaženog zastupnika Kojovića kada je rekao da imamo 18 ruku, ja ću to demantovati, mi imamo 22 ruke. I ako želite da pokazujemo mišiće kao što vi to često kažete na Skupštini, a vi često kažete na samoj Skupštini da parlament može sve izuzev da ima djecu. Evo ja ću pokazati vama uvaženi Kojoviću spisak 22 potpisana čovjeka koji su i za hitnu sjednicu i za rekonstrukciju ove Vlade. Iz kojeg razloga? Iz razloga koje ste spomenuli. Reformska agenda, Akcioni plan i sve ono što je potpisano sa vrha i spušteno na kantonalnu skupštinu našu.

Poslanik/zastupnik Predrag Kojović replika:

Poštovani kolega Čelik, meni je stvarno drago da sam imao priliku u ovom mandatu upoznati vas jer mi je to dalo nadu da eventualno se čak i u SDA pojavljuju neki ljudi, neka nova generacija koja je kako bih rekao moderna, zna šta znači Zakon i zna šta znači demokratske procedure. I upoznao sam vas dovoljno dobro da znam da procijenim kada nešto branite iz uvjerenja onda ste jako dobri u tome, a kada nešto branite a ne vjerujete ni vi sami u to kao što je u ovom slučaju imamo ovdje, onda to zvuči ovako nedoraslo kao što ste sada uradili. Tačno je da ja kažem da parlament može sve osim imati djecu. I znate kako je trebalo uraditi ovo što ste vi htjeli. Na dan kada ste objavili imena novih ministara u Vladi poslati poziv za sjednicu Skupštine Kantona Sarajevo redovnu, staviti kao prvu tačku izmjene Poslovnika, usvojiti izmjene Poslovnika, izmijeniti i hitnu sjednicu i onda sutradan zakazati hitnu sjednicu i u skladu sa poslovničkim odredbama koje ste upravo uradili. Znači parlament može sve ali postoje procedure i mehanizmi, demokratski procesi kako parlament može sve. A vi mislite da ja parlament koliko nas ima u Sali. Znači imamo ove dvije partije koje su sklopile koalicioni sporazum, ovih ostalih par nezavisnih poslanika ćemo kupiti tako što ćemo im nezakonito ponuditi pozicije u upravljačkim strukturama. Premijeru hoćete da vam kažem da se radi, znači imamo ovdje čovjeka kada dođe recimo izvještaj o poslovanju Javne institucije Kampus onda će recimo neki poslanici ovdje koji su predsjednici UO u toj JU glasati za izvještaj ili kritikovati taj izvještaj, ili recimo Gerontološkog centra. Da ne nabrajam imena. A vi ste premijeru, sjećam se jako dobro kada smo zajedno nakon februarskih demonstracija i vi ste tada bili vrlo oštri u tim istupima. Ali tada ste bili poslanik/zastupnik, tada ste drugačije govorili, borili za to da poslanici ne mogu biti u rukovodstvima JP, i smatrali ste da to što u zakonu se ne kaže i ustanova je greška koju je trebalo ispraviti. I donijeli smo zaključak, ako hoćete ja ću vam ga pročitati, u kome se kaže da poslanici više ne mogu biti birani i ne mogu biti članovi u JP i JI. A ta parlamentarna većina o kojoj vi govorite, ta 22 glasa, kolega Čelik je upravo formirana na tome. Prema tome, ništa se u SDA glavama očigledno nije promijenilo u posljednjih 20 godina i vi još uvijek mislite da ako dovoljno budete gurali u ovom pravcu stvarno možete BiH dovesti u Afriku a ne u Europu gdje deklarativno.

Predsjedavajući:

Zahvaljujem uvaženom zastupniku Kojoviću. Jel se još neko javlja za raspravu? Ukoliko se niko ne javlja za raspravu. Zaključujem i pročitat ću prijedlog dnevnog reda.

Shodno naprijed navedenom Prijedlog dnevnog reda 5. hitne sjednice Skupštine Kantona Sarajevo glasi:

1. Potvrđivanje prijedloga kandidata za predsjedavajućeg odnosno dopredsjedavajućeg Skupštine Kantona Sarajevo;
2. Prijedlog odluke o izmjenama i dopunama Poslovnika Skupštine Kantona Sarajevo;
3. Prijedlog odluke o izmjeni Odluke o imenovanju Komisije za izbor i imenovanje i administrativna pitanja Skupštine Kantona Sarajevo;
4. Na prijedlog zastupnika Plehe ista tačka. Prijedlog odluke o izmjeni Odluke o imenovanju Komisije za izbor i imenovanje i administrativna pitanja Skupštine Kantona Sarajevo
5. Prijedlog odluke o potvrđivanju smjene ministara u Vladi Kantona Sarajevo;
6. Prijedlog odluke o potvrđivanju imenovanja ministara u Vladi Kantona Sarajevo.

Pardon i sedma tačka prijedlog uvaženog zastupnika Akšamije, rasprava o budžetu.

Poslanik/zastupnik Goran Akšamija:

Ne rasprava nego usvajanje Budžeta za 2016 godinu. Kada sve može bez materijala može i to. Nije nikakav problem, a s obzirom na karakter hitnosti ove sjednice koja je sazvana radi toga, onda stvarno treba da djelujemo što prije. Da čekamo još mjesec dana nije u redu. Što prije uradimo bit će bolje, i molim lijepo da ovaj prijedlog ide na glasanje. Hvala lijepo.

Poslanik/zastupnik Mirza Čelik:

Predsjedavajući zahvaljujem. Evo ja ću predložiti da se glasa pojedinačno za prijedloge dnevnog reda. A ukoliko predlagač Akšamija ima prijedlog budžeta mi ćemo ga rado danas i da nam ga dostavi naravno svima, mi ćemo ga rado uvrstiti na tačku dnevnog reda.

Predsjedavajući:

Znači imamo dopunu sedme tačke Prijedlog budžeta za 2016 godinu.

Poslanik/zastupnik Mirza Čelik poslovnička intervencija:

Ja sam maloprije rekao da tražimo da se pojedinačno izjasni za prijedloge dnevnog reda. Iz Kluba SDA i iz Kluba BOSS i nezavisnog Bjelaka. Znači imamo iz Kluba SDA jedan prijedlog dnevnog reda i dopuna je bila Kluba BOSS i Nermina Bjelaka. I molim pojedinačno da se izjasnimo a onda da objedinite, i DF-a naravno. I da se onda objedini dnevni red i da date na glasanje. Hvala.

Predsjedavajući:

E ovako, imat ćemo prvo izjašnjavanje koje je dao predsjednik Kluba SDA Mirza Čelik. Pa onda ćemo drugo izjašnjavanje predsjednika Kluba BOSS-a Plehe i treće izjašnjavanje o prijedlogu Akšamije uvaženog zastupnika. Znači pročitat ću. Prvo izjašnjavanje prvi dnevni red na prijedlog Kluba SDA.

Imamo prijedloge uvaženog zastupnika BOSS-a, imamo prijedlog uvaženog Akšamije pa ćemo se izjasniti po tri tačke posebno.

Shodno naprijed navedenom Prijedlog dnevnog reda 5. hitne sjednice Skupštine Kantona Sarajevo na prijedlog predsjednika Kluba SDA:

1. Potvrđivanje prijedloga kandidata za predsjedavajućeg odnosno dopredsjedavajućeg

- Skupštine Kantona Sarajevo;
2. Prijedlog odluke o izmjenama i dopunama Poslovnika Skupštine Kantona Sarajevo;
 3. Prijedlog odluke o izmjeni Odluke o imenovanju Komisije za izbor i imenovanje i administrativna pitanja Skupštine Kantona Sarajevo;
 4. Prijedlog odluke o potvrđivanju smjene ministara u Vladi Kantona Sarajevo;
 5. Prijedlog odluke o potvrđivanju imenovanja ministara u Vladi Kantona Sarajevo.

Molim poslanike da se izjasne o ovom prijedlogu. Prije glasanja molim vas poslovnička intervencija Kojović.

Nije još glasanje molim vas.

Poslanik/zastupnik Predrag Kojović poslovnička intervencija:

Možete li vi predsjedavajući ne gledajući taj papir sada ponoviti koje su tačke dnevnog reda?

Molim vas donesite, odšampajte, isto kao kada bih ja to predlagao odšampajte materijal donesite poslanici na skupštinske klupe prijedlog dnevnog reda s obzirom da ima sedam tačaka da ih pogledamo i da možemo glasati. Koja je šesta tačka možete li mi reći ali da ne gledate u taj papir. Molim vas, zaista, molim vas odšampajte da možemo glasati. Ne mogu upamtiti na osnovu čitanja.

Predsjedavajući:

Ja sam rekao uvaženi zastupniče Kojoviću dat ćemo na glasanje prijedlog pet tačaka koje je predložio Klub SDA; poslije toga ćemo dati na glasanje prijedlog predsjednika BOSS Plehe i treća tačka prijedlog uvaženog zastupnika Akšamije, znači da glasamo pojedinačno i onda poslije toga ćemo objediniti dnevni red jer ćemo nakon toga glasanja znati kakav je dnevni red. Znači pročitao sam prijedlog uvaženog zastupnika. Molim vas samo malo kada objedinimo ja ću tražiti da se svim zastupnicima dostavi dnevni red kada završimo glasanje.

Poslanik/zastupnik Mirsad Pindžo poslovnička intervencija:

Hvala uvaženi predsjedavajući. Ja se samo pridružujem kolegi Kojoviću koji se pozvao na Poslovnik. Ja vas molim vi ste nama svašta predložili. Tri prijedloga. Ja vas molim da zastupnicima na stolove dostavite prijedlog o kome treba da se izjasnimo, hitno ili ne hitno, to je obaveza rukovodstva Skupštine. Molim da služba isprinta prijedloge da znamo o čemu se izjašnjavamo.

Predsjedavajući:

Zahvaljujem uvaženom zastupniku Pindži. Dajem pauzu 10 minuta, 5 minuta. Samo malo poslovnička intervencija Čelik.

Poslanik/zastupnik Mirza Čelik poslovnička intervencija:

Prvo ja bih molio zastupnike da ne degradiraju rukovodstvo Skupštine, a drugo ja bih vas lijepo molio predsjedavajući da se držimo toka sjednice onako kako je i predviđeno Poslovnikom. Znači vi dajete na prijedlog Kluba zastupnika SDA prijedlog dnevnog reda. Kada pročitate to zastupnici će se izjasniti. Na prijedlog BOSS i Nermina Bjelaka zastupnici će se izjasniti. Na prijedlog DF-a također mi ćemo se izjasniti. Nakon toga objediniti ćemo dnevni red i o tome ćemo se ponovo koje budu usvojene, koje dobiju potrebnu većinu tada ćete potvrditi dnevni red, pročitati i opet ćemo se izjasniti o tačkama dnevnog reda i tada možemo uzeti pauzu pet minuta da se zastupnicima dostavi dnevni red u formi.

Predsjedavajući:

Molim vas, izvinite, ja ovako molim vas.

Poslanik/zastupnik Mirsad Pindžo:

Sve ovo što je kolega Čelik rekao ne sporim ništa ja samo molim pošto imate napisano to dajte to iskopirajte da imamo pred sobom da znamo o čemu se izjašnjavamo. To je praksa o svim tačkama kada smo razgovarali i o dnevnom redu i o zaključcima Skupštine koje predloži bilo ko od zastupnika ili klubova, ne znam zašto bi to mijenjali. I šta to predstavlja problem dva minuta da se iskopira napisani prijedlog dnevnog reda da znamo za šta dižemo ruku ili ne dižemo. U čemu je problem? Koja degradacija. Kada se usvoji onda nam i ne treba, što će nam onda. Valjda nam treba prije izjašnjavanja da znamo o čemu se izjašnjavamo. Hvala lijepo.

Predsjedavajući.

Zahvaljujem. Dajem pauzu od pet minuta. Molim službu da svim zastupnicima dostavite prijedloge dnevnog reda da se možemo izjasniti.

NASTAVAK NAKON PAUZE

Predsjedavajući:

Molim uvažene zastupnike da sjednu na svoja mjesta da krenemo sa radom. Hvala. Da li su uvaženi zastupnici dobili prijedlog dnevnog reda napisano? Pročitat ću prijedlog dnevnog reda i tako ćemo se izjašnjavati.

Prijedlog dnevnog reda 5. hitne sjednice Kluba zastupnika SDA

1. Potvrđivanje prijedloga kandidata za predsjedavajućeg odnosno dopredsjedavajućeg Skupštine Kantona Sarajevo;
2. Prijedlog odluke o izmjenama i dopunama Poslovnika Skupštine Kantona Sarajevo;
3. Prijedlog odluke o izmjeni Odluke o imenovanju Komisije za izbor i imenovanje i administrativna pitanja Skupštine Kantona Sarajevo;
4. Prijedlog odluke o potvrđivanju smjene ministara u Vladi Kantona Sarajevo;
5. Prijedlog odluke o potvrđivanju imenovanja ministara u Vladi Kantona Sarajevo.

Ko je za ovaj prijedlog?

Poslanik/zastupnik Goran Akšamija poslovnička intervencija:

Ja bih zamolio ako možemo pojedinačno da se izjašnjavamo o ovim tačkama.

Predsjedavajući:

Ovo ćemo pojedinačno ovo je prijedlog.

Poslanik/zastupnik Goran Akšamija:

Da prijedlog pojedinačno po ovim tačkama, po ovih pet tačaka da se izjašnjavamo.

Predsjedavajući:

Ovo je prijedlog SDA koji ide u paketu, znači prijedlog SDA. Pojedinačno ćemo ostale. Molim vas, već sam pročitao i da se izjasnimo o prijedlogu Kluba SDA. Ko je za? Ko je protiv? Ko je suzdržan?

Za je glasalo 22 poslanika, protiv 4 suzdržanih 3. ovaj prijedlog SDA je usvojen.

Prijedlog zastupnika Harisa Plehe, Prijedlog odluke o izmjeni Odluke o imenovanju Komisije za izbor i imenovanje i administrativna pitanja Skupštine Kantona Sarajevo. Razmatrat će se kao tačka 4. Ko je za? Ko je protiv? Suzdržanih?

Za je glasalo 22 poslanika, protiv 1 i suzdržanih 4. konstatujem da je ovaj prijedlog zastupnika Plehe usvojen.

Prijedlog zastupnika Gorana Akšamije Prijedlog budžeta Kantona Sarajevo za 2016 godinu razmatra će se kao tačka 7. ko je za? Ko je protiv? Suzdržanih?

6 za, protiv 7 i suzdržanih 21. ovaj prijedlog uvaženog zastupnika Akšamije nije prihvaćen.

Poslanik/zastupnik Goran Akšamija poslovnička intervencija:

Zahvaljujem predsjedavajući. Ja sam stvarno u ovom trenutku nešto vjerovatno konfuzan pa ne mogu da shvatim neke stvari. Na početku ove sjednice koliko sam shvatio karakter hitnosti je bio jedan od vodećih u usvajanju budžeta Kantona Sarajevo. Koliko vidim sada su predlagači glasali protiv toga pa molim obrazloženje jer stvarno ne shvatam karakter ove sjednice. A s obzirom da je nacrt budžeta otišao u javnu raspravu, znači da smo već nacrt usvojili, isto kao što je prijedlog odluke o izmjenama i dopunama Pravilnika Skupštine Kantona Sarajevo također ovdje usvojen i otišao na javnu raspravu a danas mu je dat karakter hitnosti, onda i ovaj nacrt budžeta bi se tako trebao razmatrati. Pa bih zamolio da se da neko obrazloženje povodom ovoga jer mi stvarno nije jasno. Ako je Skupština ova sazvana radi usvajanja budžeta a sada se u ovom trenutku glasa protiv toga, onda mi stvarno nije jasno gdje se nalazim. Hvala lijepo.

Predsjedavajući.

Zahvaljujem uvaženom zastupniku Akšamiji. Uvaženi zastupnik Čelik nema potrebe da odgovori. Ja ću sada pročitati jednom kako je usvojen dnevni red da se još jednom izjasnimo. Znači kompletan, konačni.

Prijedlog dnevnog reda hitne sjednice Skupštine glasi:

1. Potvrđivanje prijedloga kandidata za predsjedavajućeg odnosno dopredsjedavajućeg Skupštine Kantona Sarajevo;
2. Prijedlog odluke o izmjenama i dopunama Poslovnika Skupštine Kantona Sarajevo;
3. Prijedlog odluke o izmjeni Odluke o imenovanju Komisije za izbor i imenovanje i administrativna pitanja Skupštine Kantona Sarajevo;
4. Prijedlog odluke o izmjeni Odluke o imenovanju Komisije za izbor i imenovanje i administrativna pitanja Skupštine Kantona Sarajevo (prijedlog Haris Pleho).
5. Prijedlog odluke o potvrđivanju smjene ministara u Vladi Kantona Sarajevo;
6. Prijedlog odluke o potvrđivanju imenovanja ministara u Vladi Kantona Sarajevo.

Molim poslanike da se izjasne o Predloženom dnevnom redu.

ZA JE GLASALO 21 POSLANIK, SUZDRŽANIH 1 I PROTIV 7.

KONSTATUJEM DA JE SKUPŠTINA ZA 5. HITNU SJEDNICU SKUPŠTINE KANTONA SARAJEVO USVOJILA DNEVNI RED, KAKO JE I PREDLOŽEN.

Prelazimo na realizaciju tačke 1.

AD – 1.

POTVRĐIVANJE PRIJEDLOGA KANDIDATA ZA PREDSJEDAVAJEĆEG I

DOPREDSJEDAVAJUĆEG SKUPŠTINE KANTONA SARAJEVO

Klub Hrvata je 20.11. 2015.godine održao sjednicu na kojoj je izabrao Anu Babić kao kandidata za predsjedavajućeg ili zamjenika predsjedavajućeg Skupštine Kantona Sarajevo.

U skladu sa članom 10. Poslovnika Skupština glasanjem potvrđuje izbor kandidata.

Molim poslanike/zastupnike da pristupe izjašnjavanju o izboru kandidata Ane Babić za predsjedavajućeg ili zamjenika predsjedavajućeg Skupštine Kantona Sarajevo iz reda Hrvatskog naroda.

ZA JE GLASALO 29 POSLANIKA, PROTIV niko i SUZDRŽAN niko.

Konstatujem da je Skupština potvrdila izbor Ane Babić za predsjedavajućeg ili zamjenika predsjedavajućeg Skupštine Kantona Sarajevo iz reda Hrvatskog naroda.

Čestitam novoizabranom kandidatu za predsjedavajućeg ili zamjenika predsjedavajućeg iz reda Hrvatskog naroda.

Obavještavam Vas da u skladu sa čl. 10. stav 3. Poslovnika Skupštine Kantona Sarajevo tri kandidata čiji je izbor potvrdila Skupština između sebe odlučuju ko će biti predsjedavajući Skupštine i odluku saopćavaju Skupštini te u tom smislu dajem pauzu od 10 minuta kako bi potvrđeni kandidati donijeli ovu odluku.

NASTAVAK NAKON PAUZE

Predsjedavajući:

Molim vas možemo li zauzeti svoja mjesta da krenemo sa radom? Zahvaljujem.

Nastavljamo sa radom. Obavještavam skupštinu da su kandidati za predsjedavajućeg ili dopredsjedavajućeg donijeli odluku da funkciju predsjedavajućeg Skupštine obavlja Ana Babić.

Molim novoizabranog predsjedavajućeg da zauzme svoje mjesto i nastavi sa daljim vođenjem sjednice Skupštine.

Predsjedavajuća Ana Babić:

Hvala vam lijepo.

Dame i gospodo, cijenjeni poslanici, poštovani članovi Vlade, uvaženi gosti i naravno gledaoci pored naših ekrana. Velika mi je čast što ste mi dali ovako jednu veliku obvezu da obnašam dužnost predsjedateljice i zato zahvaljujem gospodi Seji Bukvi koji je bio suzdržan i Sabahudinu Delaliću koji je svakako dao glas za mene. I ja bih voljela da u ovom slučaju odmah krenemo sa radom, te predlažem da krenemo sa realizacijom druge tačke dnevnog reda, a to je:

AD - 2.

PRIJEDLOG ODLUKE O IZMJENAMA I DOPUNAMA POSLOVNIKA SKUPŠTINE KANTONA SARAJEVO

Prijedlog odluke ste svakako dobili u toku sjednice ako niste evo molim Predlagača da podnese uvodne napomene. Izvolite. Gospodin Mirza Čelik.

Poslanik/zastupnik Mirza Čelik.

Zahvaljujem predsjedavajuća. Evo ja ujedno koristim priliku da vas pozdravim i naravno da vam čestitam na izabranoj funkciji. Evo dok stručne službe dijele ja ću kratko krenuti o Prijedlogu odluke o izmjenama i dopunama Poslovnika Skupštine Kantona Sarajevo i u članovima koji se mijenjaju.

Na osnovu člana 18 stav 1 tačka 1 Ustava Kantona Sarajevo Službene novine Kantona Sarajevo

broj 1/96, 2/96, 3/96, 16/97, 14/2000, 4/2001, 28/04 i 6/2013 i člana 117 Poslovnika Skupština Kantona Sarajevo Službene novine Kantona Sarajevo Drugi novi prečišćeni tekst broj 41/12, Skupština Kantona Sarajevo na sjednici održanoj 24.11.2015 donijela je Prijedlog odluke o izmjenama i dopunama Poslovnika Skupštine Kantona Sarajevo.

Član 1.

U Poslovniku Skupštine Kantona Sarajevo ("Službene novine Kantona Sarajevo broj: 41/12; 15/13 i 47/13) kroz čitav tekst člana 37. iza riječi: "potvrđivanje", dodaje se riječ: ", smjenjivanje" u odgovarajućem padežu.

Član 2.

U članu 201. iza riječi "Skupština", dodaju se riječi: ", uključujući i ministre Vlade Kantona Sarajevo".

Član 3.

Iza člana 202. riječi: "Izbor premijera Kantona", zamjenjuju se riječima: "Izbor premijera Kantona i izbor i smjena ministara Vlade Kantona".

Član 4.

Iza Člana 205. dodaju se novi članovi "205-a" i "205-b" koji glase:

"Član 205-a.

Ministar je odgovoran ako se u izvršavanju svojih ovlaštenja i obaveza ne pridržava ustava, zakona i drugih propisa i općih akata, ili ako u okviru svojih nadležnosti ne osigurava provođenje zakona i drugih propisa i općih akata, ili ako iz drugih razloga postane nedostojan vršenja funkcije ministra.

Ako se utvrdi da postoji odgovornost iz stava 1. ovog člana, ministar se smjenjuje sa funkcije, a smjenjivanje ne isključuje krivično gonjenje, niti odgovornost u građanskom postupku, ako ustavom i zakonom nije drugačije određeno.

U slučaju iz stava 1. i 2. ovog člana, premijer Kantona dostavlja predsjedavajućem Skupštine prijedlog smjene ministara, a koji će odmah i bez odlaganja ovaj prijedlog proslijediti Komisiji za izbor i imenovanje, a koja na osnovu njega utvrđuje prijedlog odluke o smjeni ministara Vlade Kantona Sarajevo.

Skupština donosi odluku o potvrđivanju smjene ministara Vlade Kantona Sarajevo javnim glasanjem.

Odluka o smjeni ministara stupa na snagu ukoliko je za nju glasala većina svih izabranih poslanika/zastupnika u Skupštini.

Član 205-b.

Premijer će, u slučaju donošenja Odluke iz člana 205-a stav 4. i smjene ministara dostaviti predsjedavajućem Skupštine prijedlog kandidata ministara na upražnjenu ministarsku funkciju čiji će se izbor vršiti hitno i u proceduri sukladno članu 204. i 205. ovog Poslovnika, s tim da rok može biti kraći od roka utvrđenog u članu 204. ovog Poslovnika."

Član 5.

Ova Odluka stupa na snagu danom donošenja, a objaviće se u Službenim novinama Kantona Sarajevo.

Zahvaljujem.

Predsjedateljica:

Hvala gospodin Čelik. Ima li pitanja. Izvolite.

Poslanik/zastupnik Predrag Kojović:

Zahvaljujem predsjedavajuća. Meni je žao što, samo ću to prije nego što kažem o čemu sada želim da govorim, prethodna odluka koju smo donijeli o vašem imenovanju ima finansijske efekte na budžet Kantona Sarajevo s obzirom da postoji razlika u primanjima između vas kao poslanika i vas kao predsjedavajuće Skupštine. I kao što piše u svakom priručniku za početnike u parlamentarnim procedurama, za takvu odluku bila je potrebna saglasnost Vlade. Ali mi smo to preskočili. Nije bitno sada to.

Ono što sam ja htio da vas zamolim jeste da s obzirom da se radi o značajnim promjenama, radi se o promjenama u Poslovniku koje citiraju smjenu i rekonstrukciju izvršne vlasti da nam dozvolite jednu razumnu pauzu u kojoj bi smo mogli s obzirom da smo prije bukvalno tri sekunde upoznati sa ovim materijalom da proučimo ovaj materijal kako bi smo mogli zauzeti svoj stav. Ja bih vam preporučio da nam date jednu racionalnu pauzu jedne racionalne u smislu vremena, u protivnom mi ćemo iskoristiti svoje naravno pravo konsektivnim polusatnim pauzama, ali mislim da izbjegnemo to htio sam vas zamoliti samo da nam date ja ne znam koliko je to, sat vremena možda da se pozabavimo ovim.

Poslanik/zastupnik Goran Akšamija:

Zahvaljujem novoj predsjedavajućoj. Ujedno i čestitam i želim mnogo uspjeha u radu. Povodom obrazloženja Prijedloga odluke o izmjenama i dopunama Poslovnika Skupštine Kantona Sarajevo želio bih postaviti jedno pitanje, odnosno poznato nam je da smo ovdje usvojili Nacrt ovog Poslovnika koji je otišao u javnu raspravu. Ako se danas usvoji ovaj prijedlog odluke sa postojećim izmjenama šta se dešava sa Nacrtom koji je otišao u javnu raspravu i koji će Poslovnik biti na snazi nakon završene javne rasprave. Ovo mi stvarno nikako nije jasno. Da li će se povući iz javne rasprave taj nacrt koji je otišao pa se uputiti ovaj kao novi, iako ide po nekoj hitnoj proceduri, ali mi faktički sada imamo dva nacrta. Hvala.

Predsjedavajuća.

Ima li još neko da se javi za raspravu? Nema. Otvaram raspravu? Može, može izvolite.

Poslanik/zastupnik Mirza Čelik:

Na današnjoj sjednici kao i na svim narednim mi ćemo raditi po Poslovniku o radu Skupštine. Kada se usvoji i kada prođe javnu raspravu novi Poslovnik o radu Skupštine mi ćemo raditi po tom Poslovniku. Današnja sjednica podrazumijeva da radimo po Poslovniku koji je važeći i samo se radi o dopuni i izmjenama Poslovnika o radu Skupštine. Zahvaljujem.

Predsjedateljica:

Ima li još pitanja? Dajem pauzu od pola sata koju je tražio gospodin Kojović. Molim vas u sobi broj 100 imate jedan domjenak pa izvolite da se malo osvježite i počastite, hvala.

NASTAVAK NAKON PAUZE**Predsjedateljica:**

Molim službu možemo li početi? 20 zastupnika, dobro. Ja sam očekivala da će biti gospodin Kojović ovdje da mi obrazloži zašto je bila pauza. Ali nema veze, ja otvaram raspravu po ovom Prijedlogu odluke o izmjenama i dopunama Poslovnika Skupštine Kantona. Ima li rasprave? Nema rasprave. Nisam vidjela, oprostite gospodine Pindžo.

Poslanik/zastupnik Mirsad Pindžo:

Zahvaljujem uvažena predsjedavajuća. Čestitamo i želim uspješan rad svima nama a vama posebno jer ste vi najistureniji kao prva među jednakima, jel se tako to kaže? Evo sada smo dobili u hitnoj proceduri Prijedlog odluke o izmjenama i dopunama Poslovnika Skupštine Kantona i moja prva dilema je da li se u isto vrijeme u proceduri mogu naći i razmatrati dva ista akta, jer Poslovnik o radu Skupštine Kantona Sarajevo je ova Skupština zaključkom jednoglasno utvrdila nacrt i uputila ga je u javnu raspravu. Znači to je prva dilema. Danas imamo izmjene poslovnika. Činjenica da nije precizirano ali bi logično bilo da se u isto vrijeme ne vode dva procesa o istom dokumentu ali evo. Pošto ne vrijede argumenti nego sila, onda može i tako, kada je u pitanju suština, ukratko ovo što sam uspio pogledati za ovih pola sata kako smo dobili ovaj materijal, ja ne vidim ni jedan jedini razlog izmjena Poslovnika da bi se desilo danas ono što treba da se desi, ono što je previđeno u već utvrđenom dnevnom redu. U ovom izmijenjenom Poslovniku se samo dodatno razrađuje, odnosno dodatno precizira nešto što je već precizirano ovim Poslovnikom. U članu 37 govori i razrješenje i potvrđivanje. Prema tome, dodavanje riječi smjenjivanje, razrješenje. U obrazloženju rješenja stoji zbog čega se neko razrješava. Da li se smjenjuje zbog kršenja ustava, zakona, zbog smrti zbog bolesti, zbog podnošenja ostavke ili iz drugih razloga, manje važno. Dodavanje izmjena ustvari u članu 202 pa izmjena naslova u Poslovniku gdje stoji izbor premijera pa dodavanje i izbor i smjene ministara naravno to apsolutno ništa ne znači ali evo. Dodavanjem nova dva stava, odnosno člana 205a i 205b ima samo jedna stvar. U članu 205 doslovno stoji da lice koga imenuje ili potvrđuje Skupština Kantona, a to je Vlada i svaki ministar pojedinačno kaže da može biti smijenjeno ako ne vrši funkciju, ne vrši dužnost u skladu sa Ustavom zakonom i u okviru datih ovlaštenja. Jedina novina u ovim izmjenama je ako iz drugih razloga postane nedostojan vršenja funkcije ministra, ne provođenje, kršenje zakona je i ne osiguravanje, jer u nadležnostima Vlade i ministara stoji da su dužni pridržavati se i da osiguravaju provođenje, prema tome to je vrlo jasno i precizno rečeno. Osiguravaju provođenje zakona u oblastima za koje su nadležni i odgovorni. I stoji i dalje da su ministri odgovorni za vođenje poslova u svojim resorima. Prema tome, ne kompletna Vlada, nego ministri. Prema tome ja ne vidim tu potrebu, osim ako su ministri koji će danas biti razriješeni, smijenjeni nedostojni vršenja funkcije. Ali dobro, možda je to razlog. Možda kada čujemo obrazloženje, možda će biti jasnije. Tako da ja stvarno ne vidim ni jednog jedinog razloga zašto je mijenjan Poslovnik. Ja da budem iskren, ja sam očekivao da se u Poslovniku napiše ono što je činjenica. Legitimno je pravo političkih subjekata da mijenjaju koalicije i da danas bude jedna koalicija, sutra druga, prekosutra treća ili nije bitno koja je. Pošto to nije precizirano Poslovnikom ja sam očekivao da ćete to napisati da i ta mogućnost stvaranjem okolnosti i promjenom koalicije odnosno parlamentarne većine da se u tom slučaju mogu razriješiti ministri iz prethodne koalicije odnosno stranke koja više nije dio vladajuće većine. Ja zato kažem ne vidim ni jedan jedini razlog zašto se mora mijenjati Poslovnik u hitnoj proceduri ako niste već predvidjeli ono zbog čega ga i mijenjamo. Hvala lijepa.

Predsjedateljica:

Ima li još pitanja? Rasprava.

Poslanik/zastupnik Predrag Kojović:

Ja imam pitanje zaista za predlagača. Neuobičajeno je jednim nižim pravnim aktom zahtijevati da ljudi koji su u izvršnoj vlasti poštuju više pravne akte. Znači recimo da donesete u mjesnoj zajednici pravilnik u kome kažete premijer Kantona mora poštovati Ustav Kantona Sarajevo. A recimo to je upravo ovdje što vi radite u ovom članu 4 izmjena i dopuna, kažete ministar je odgovoran ako se u izvršenju svojih ovlaštenja ne pridržava Ustava, zakona itd. Znači ne razumijem koja je svrha ove odredbe. Znači vi donosite jedan pravni propis kojim govorite ljudima da moraju poštovati drugi pravni propis. Ja sam siguran da oni koji su imali namjeru da prekrše Zakon i Ustav Kantona Sarajevo kada pogledaju ovu odredbu Poslovnika Skupštine će

reći e pa onda ne smijem to raditi pošto piše u Poslovniku. Tako da, ja sam imao nekoliko diskusija i u prethodnom mandatu na ovu temu, kada se ljudi čija je obaveza da poštuju Zakon dodatno pozivaju da poštuju Zakon, pa bih samo molio predlagača da mi obrazloži koliko puta se zapravo treba tražiti od nekih ljudi da poštuju Zakon i kako misle da će ovo imati efekat na poštivanje zakona?

Predsjedateljica:

Ima li još rasprave? Zaključujem raspravu. Hoće li gospodin Predlagač Mirza Čelik? Dobro. Zaključujem raspravu. Ukoliko nema više javljanja ja predlažem da se izjasnimo. Dakle, ukoliko više nema javljanja za riječ, zaključujem raspravu.

MOLIM POSLANIKE DA PRISTUPE IZJAŠNJAVANJU O PRIJEDLOGU NAVEDENE ODLUKE.

ZA JE GLASALO 20 POSLANIKA, PROTIV 8 i SUZDRŽAN 1.

KONSTATUJEM DA JE SKUPŠTINA DONIJELA ODLUKU da je Prijedlog odluke o izmjenama i dopunama Poslovnika Skupštine Kantona Sarajevo usvojen.

Prelazimo na treću tačku dnevnog reda, a ona je:

AD – 3.

PRIJEDLOG ODLUKE O IZMJENI ODLUKE O IMENOVANJU KOMISIJE ZA IZBOR I IMENOVANJE I ADMINISTRATIVNA PITANJA SKUPŠTINE KANTONA SARAJEVO

Prijedlog odluke ste dobili u toku sjednice.

Molim Predlagača da podnese uvodne napomene, gospodine Ademović Kemale, vi ste predsjednik Komisije. Evo samo trenutak, polako, strpljenje.

Poslanik/zastupnik Kemal Ademović:

Uvažena predsjedavajuća, čestitam vam na vašem izboru i želim vam uspješan rad. Dakle uvaženi zamjenici predsjedavajuće, premijeru i članovi Vlade, kolegice i kolege zastupnici, predstavnici javnih institucija, ustanova, udruženja, sindikata, gledaoci TVSA sve vas selamim i pozdravljam, obzirom da se prvi put javljam. Na osnovu zahtjeva Kluba SBB-a a o zamjeni člana Komisije, rahmetli Adnana Solakovića koji je bio član Komisije za izbor i imenovanje, Komisija za izbor i imenovanja je na svojoj sjednici utvrdila Prijedlog da se za člana umjesto rahmetli Adnan Solakovića izabere zastupnik Dževad Rađo. To je svo objašnjenje. Hvala.

Predsjedateljica:

Dobro. Ima li pitanja? Otvaram raspravu. Zatvaram raspravu.

MOLIM POSLANIKE DA PRISTUPE IZJAŠNJAVANJU O PRIJEDLOGU NAVEDENE ODLUKE.

ZA JE GLASALO 29 POSLANIKA, PROTIV nitko i SUZDRŽAN nitko.

KONSTATUJEM DA JE SKUPŠTINA DONIJELA ODLUKU da umjesto rahmetli gospodina Adnana Solakovića njegovo mjesto preuzme gospodin Rasim Lakota. Ispričavam se, Rađo

Dževad. Ispričavam se.

Četvrta tačka dnevnog reda.

AD -4.

PRIJEDLOG ODLUKE O IZMJENI ODLUKE O IMENOVANJU KOMISIJE ZA IZBOR I IMENOVANJE I ADMINISTRATIVNA PITANJA SKUPŠTINE KANTONA SARAJEVO

A to je Predlagač gospodin Pleho. Ima li pitanja? Evo samo da podijelimo materijal. Dobili ste ovaj materijal. Otvaram raspravu.

Poslanik/zastupnik Mirsad Pindžo:

Hvala uvažena predsjedavajuća. Da sada ne tražim po ovom Poslovniku, ali Poslovnik o radu Skupštine Kantona Sarajevo kaže da svaki zastupnik mora biti u najmanje dva radna tijela, dvije komisije. Drugi član, da ga sada ne citiram i ne tražim, da ne oduzimam vrijeme, pošto vidim da je žurba kaže da se raspored u komisijama političkim subjektima raspoređuju u najvećoj mogućoj mjeri prema izbornim rezultatima. Prvo razrješenjem gđina ovaj prijedlog razrješenja dr Akšamije, kršite Poslovnik jer ga onda nema u druge dvije komisije, drugo Klub DF-a ima sedam članova, a Klub BOSS-a, odnosno politički subjekt BOSS dva člana. Pa je li to pravedna raspodjela u skladu sa izbornim rezultatima? Ja mislim da Komisija za izbor i imenovanje mora se očitovati o ovom prijedlogu i raspraviti ovo što Poslovnik nalaže pa tek onda da se ova Skupština izjasni o ovom prijedlogu. U tom smislu, pošto su članovi Komisije za izbor i imenovanje tu, ja predlažem da se napravi pauza i Komisija da zasjeda i očituje se o ovom prijedlogu uvaženog kolege Plehe. Hvala lijepo.

Poslanik/zastupnik Haris Pleho:

Hvala predsjedavajuća. Kao prijedlog ispred Kluba BOSS Nermin Bjelak mi smo imali jednu inicijativu da se u Komisiju za izbor i imenovanje nađe neko ispred našeg Kluba. Obzirom da je to bila praksa, tako je bar u startu rad ove Skupštine, rekao kolega Pindžo da neko iz Kluba mora biti u toj Komisiji za izbor i imenovanje. U potpunosti se slažem sa kolegom Pindžom da Poslovnik trebamo ispoštovati i da zastupnik mora imati najmanje dvije komisije. Vodeći računa da ja ne dobijem tri komisije, ja sam uz ovu inicijativu također podnio inicijativu da se razriješim iz komisije za mlade. Obzirom da taj prijedlog nije prihvatila već razmatrala Komisija za izbor i imenovanje, moja obaveza je bila da takvu inicijativu prosljedim Skupštini. Ja molim da se o toj inicijativi danas izjasnimo. Hvala lijepo.

Predsjedateljica:

Dobro. Da li se još neko javlja za riječ? Zaključujem raspravu. Mi smo upravo dobili prijedlog za smjenjivanje ministara u Vladi Kantona Sarajevo, s obzirom da je stigao ovaj prijedlog o smjenjivanju ministara u Vladi Kantona Sarajevo po Poslovniku sam dužna ovaj prijedlog odmah dostaviti Komisiji za izbor i imenovanje, i stoga dajem pauzu od 15 minuta.

Ja se izvinjavam. Nemojte mi zamjeriti pošto prvi put vodim.

Obzirom da je zaključena rasprava ja vas molim da sada se izjasnimo o ovom odluci o izmjeni imenovanja Komisije za izbor i imenovanja, administrativna pitanja Skupštine Kantona Sarajevo. Hvala gospodine Pindžo na sugestiji.

Poslanik/zastupnik Mirsad Pindžo:

Razumijem da ste tek danas počeli pa niste. Ja sam zatražio što je moje legitimno pravo kao zastupnika a pogotovo kao predsjednika Kluba u ime Kluba da se o ovom prijedlogu,

pozivajući se na Poslovnik, da ga ne kršimo, da se izjasni Komisija za izbor i imenovanja koja sjedi u ovoj Sali, zatražio da se napravi pauza da se o ovom prijedlogu očituje Komisija za izbor i imenovanje da ne bi došli u poziciju da još jednom kršimo Poslovnik. I vi taj prijedlog morate razmotriti i staviti na izjašnjavanje u krajnjem slučaju prije izjašnjavanja o navedenoj odluci. Hvala lijepo.

Predsjedateljica:

Stavljam na glasanje prijedlog gospodina Pindže. Tko je za? Tko je protiv? Tko je suzdržan?

Prijedlog nije usvojen.

Poslanik/zastupnik Mirsad Pindžo:

Mogu li ja dobiti riječ?

Predsjedateljica:

Rasprava je gotova. Idemo dalje.

Poslanik/zastupnik Mirsad Pindžo:

Ja uvažena predsjedavajuća ne želim raspravljati nego u ime Kluba zatražiti pauzu pola sata.

Poslanik/zastupnik Dževad Rado:

Pošto je po ovoj tački dnevnog reda završena rasprava izjasnit ćemo se o glasanju i onda naravno može se tražiti pauza. Hvala lijepo.

Poslanik/zastupnik Mirsad Pindžo:

Ne bih ja podučavao nikoga Poslovniku koji izričito kaže na zahtjev predsjednika Kluba pauza se daje bez obrazloženja. I molim pauzu pola sata. Hvala.

Dopredsjedavajući Sabahudin Delalić govori bez mikrofona.

Poslanik/zastupnik Mirsad Pindžo:

Recite mi gospodine dopredsjedavajući pročitajte mi Poslovnik gdje kaže da odlučuje bilo ko ili predsjedavajući, radno predsjedništvo ili Skupština kada predsjednik Kluba zatraži pauzu, molim vas pročitajte taj član.

Dopredsjedavajući Sabahudin Delalić:

Član Poslovnika 93. pauzu tokom sjednice do 30 minuta daje predsjedavajući na zahtjev zastupničkog kluba, kluba naroda, ili jedne trećine poslanika odnosno zastupnika. Zahtjev za pauze do 30 minuta odobrava predsjedavajući bez obrazloženja. Zahtjev. Odobrava. Evo izgleda da nam nije odobrila u ovom momentu.

Predsjedateljica:

Nisam odobrila pauzu. Molim vas glasamo o Izmjeni odluke o imenovanju Komisije za izbor i imenovanja administrativna pitanja Skupštine Kantona Sarajevo. Tko je za? Tko je protiv? Tko je suzdržan?

Molim službu, recite.

Konstatujem da je glasalo 23 poslanika za, protiv nula i suzdržano 5.

Konstatujem da je Skupština donijela Odluku o izmjeni Odluke o imenovanju Komisije za izbor i imenovanja i administrativna pitanja Skupštine Kantona Sarajevo.

Prelazimo na tačku 5.

Obzirom da je stigao Prijedlog odluke o smjenjivanju ministara u Vladi Kantona Sarajevo, po Poslovniku sam dužna ovaj Prijedlog odmah dostaviti Komisiji za izbor i imenovanja stoga dajem pauzu od 15 minuta kako bi se ova procedura ispoštovala. Hvala lijepo. Pauza.

NASTAVAK NAKON PAUZE

Predsjedateljica:

molim Službu da utvrdi da li smo svi u Sali, molim vas. Možemo li početi? Može.

Tačka broj pet.

AD – 5.

PRIJEDLOG ODLUKE O POTVRĐIVANJU SMJENE MINISTARA U VLADI KANTONA SARAJEVO

Prijedlog odluke ste dobili u toku sjednice. Komisija je upravo sada zasjedala, i molim Predlagača da iznese svoj stav. Rekli su nam da je tu, pa zato smo i počeli. Ne možemo bez njega. Evo sačekat ćemo još malo. Ne možemo praviti pauze više, moramo raditi konstruktivno i završavati ove obaveze koje imamo. Da li može neko iz Službe potvrditi šta je sa Predlagačem. Hvala vam na strpljenju. Evo možemo sada početi. Evo služba je čini mi se obavila svoj posao. Molim Predlagača da podnese uvodne napomene. Izvolite.

Poslanik/zastupnik Kemal Ademović predsjednik Komisije za izbor i imenovanje:

Hvala. U pauzi koju ste nam dali, sastala se Komisija za izbor i imenovanja koja broji 7 članova. Prisutno je bilo 6. i donijela dvije odluke, jedna je Odluka o potvrđivanju smjenjivanja ministara u Vladi Kantona Sarajevo a drugi je Prijedlog odluke o potvrđivanju iste koju treba da donese Skupština Kantona Sarajevo. Dakle Odluku o potvrđivanju smjenjivanja ministara u Vladi Kantona Sarajevo potvrđuje se smjenjivanje ministara u Vladi Kantona Sarajevo u sastavu:

1. Enver Smajkan ministar ministarstva pravde i uprave
2. Emira Tanović Mikulec ministrica ministarstva zdravstva
3. Samer Rešidat ministar ministarstva kulture i sporta
4. Karolina Karačić ministrica ministarstva za rad socijalnu politiku raseljena lica i izbjeglice
5. Predrag Kurteš ministar ministarstva unutrašnjih poslova

To je to.

Predsjedateljica:

Hvala lijepo. Ima li pitanja? Nema. Otvaram raspravu. Zatvaram raspravu. Nisam vas vidjela gospodine Pindžo, nekako ste previše tihi, ne znam možda djelujem na vas onako agresivno. Izvolite.

Poslanik/zastupnik Mirsad Pindžo:

Hvala uvažena predsjedavajuća. Mogli bi malo i podiči glavu kao i onda kada ste rekli i prekršili Poslovnik da ne date pauzu predsjedniku Kluba. Ali dobro. Nisam se zbog toga javio. Dvije stvari. Jedna je u najmanju ruku sam očekivao i bilo bi logično i normalno i poželjno da premijer Kantona koji je formalni predlagač ove odluke da i obrazloženje jer koliko osam, devet mjeseci su radili ti ljudi u tom kabinetu i logično bi bilo da se nešto kaže o tome. Ali naravno ako to premijer ne želi ja ne insistiram na tome. Ja insistiram na jednoj drugoj stvari pošto smo

sada došli sa komisije za izbor i imenovanja i na njoj smo usvojili Odluku o potvrđivanju smjenjivanja ministara u Vladi Kantona Sarajevo naravno većinom glasova, u kojoj se u preambuli ove odluke poziva na član 205a. U ovoj Odluci i takva je odluka usvojena, voljom većine članova komisije, a u Odluci koje su podijeljene na stolove dodato je Član 205 a stav 3 što nije bilo na komisiji i nije dozvoljeno nakon usvajanja odluke dopisivati. Vrlo je jednostavan razlog i meni je potpuno jasno i nije mi drago što je to predsjedavajući komisije uradio jer sam ga ja upozorio na to jer sam rekao da ću pitati pa je onda to ispravio. Ali to se tako ne radi ne može se ispravljati u hodu i nakon što organi donesu odluke. To je kršenje. A moje pitanje predlažući, član 205 a Poslovnika koji je usvojen prije pola sata u stavu I kaže: ministar je odgovoran ako se u izvršavanju svojih obaveza i ovlaštenja ne pridržava Ustava, zakona i drugih propisa i općih akata, ili ako u okviru svojih nadležnosti ne osigurava provođenje Zakona i drugih propisa i općih akata što je jedno te isto jer osiguravati ili provoditi ili kršiti potpuno je isto i ako ne osigurate znači kršite. Ili ako iz drugih razloga postane nedostojan vršenja funkcije ministra. Obzirom da se u preambuli pozvao na ovaj član ja bih molio obrazloženje za ove ljude koji se danas smjenjuju. Koja od ovih odredbi kršenja Zakona ili nedostajan vršenja funkcije ministra. Ja molim da se bar toliko imamo obaveze prema ljudima koji su radili u ovoj Vladi da im kažemo zbog čega ih smjenjujemo. Ja sam na Komisiji vrlo krato ću, na Komisiji sam rekao obrazloženje koje je premijer dao potpuno nepotrebno ovo sve danas što se radilo. Vrlo jasno precizno, nova parlamentarna većina i predlaže smjenu ministara koji nisu dio koji nisu iz stranke koja čini novu parlamentarnu većinu. Međutim, onda je nepotrebno pozivanje na sve ove članove i pošto se već pozvalo, ja onda tražim obrazloženje koji je od ovih razloga pored toga što nisu dio parlamentarne većine. Jer kada se pozovete na član, onda u tom članu, citirao sam ga šta kaže, molim obrazloženje koji od ovih razloga, kršenje ustava i zakona ili nedostojna vršenja funkcije ministra. Hvala lijepo.

Poslanik/zastupnik Eldar Čomor ispravka krivog navoda:

Hvala predsjedavajuća. Premijeru neću ja na ovo drugo pitanje kolege Pindže već na prvu konstataciju kolege Pindže gdje spominje odluku Komisije član 205 a stav 3 kaže da je napisano a nije rečeno na samoj sjednici Komisije. Jeste. Predsjedavajući Komisije kolega Ademović Kemal je rekao na osnovu člana 37, i ili člana 205 a stav III. Čak je i napisao odmah na papiru i dao to sekretaru da ispravi to u dokumentima kako bi takav ispravljen tekst došao pred skupštinu kako ne bi bilo kakvih zabuna kod zastupnika u Skupštini Kantona Sarajevo. Znači bilo je 205a stav III.

Poslanik/zastupnik Mirsad Pindžo replika:

Ma nije korektno ovo što radite. Evo odluke koja je došla pred Komisiju. Ako hoćete da čitam preambulu koja kaže Na osnovu Amandmana Ustava Kantona službene novine te, Zakona o Vladi, Zakona o organizaciji organa uprave u FBiH, Poslovnika Skupštine člana 205 a i člana 205 b a u vezi sa članom 201 Poslovnika Skupštine Kantona Sarajevo. Za takvu odluku se izjasnila komisija za izbor i imenovanje. I nije korektno naknadno dopisivanje. A dopisivanje se desilo na moju intervenciju da ću pitati koji je od ovih razloga. To nije u redu. Ali to je nebitno. Ja sam postavio pitanje. Ako premijer ima potrebu da odgovori nek odgovori. Ako nema to je sad već njegova stvar.

Poslanik/zastupnik Kemal Ademović.

Mogu li dobiti od vas Pindžo ovu odluku koju ste čitali? Eh, mi smo na komisiji donijeli dvije odluke. Jedna odluka je koju donosi Komisija a to je odluka o potvrđivanju smjenjivanja ministara u Vladi Kantona Sarajevo. Zastupnik Pindžo je čitao ovu drugu odluku. Odluka o potvrđivanju smjenjivanja ministara u Vladi Kantona Sarajevo prijedlog koji treba da donese Skupština. Dakle to su dvije različite odluke. Hvala.

Predsjedateljica:

Ako nema rasprave dajem riječ premijeru Konakoviću.

Premijer Elmedin Konaković:

Poštovana predsjedavajuća, dopredsjedavajući, sekretaru, poštovane zastupnice i zastupnici u Skupštini Kantona Sarajevo, poštovani ministri u Vladi Kantona Sarajevo, poštovani gosti, cijenjeni gledaoci TVSA, eselamu alejkum i dobar vam dan. Ja sam krenuo kao što ste vidjeli maloprije sam zato što sam htio da nešto kažem i vratio sam se sa bine jer je kolega Ademović počeo kao predlagatelj, formalni za skupštinu čitati materijal koji se zove odluka o smjeni. Napomenut ću nešto što sam rekao više puta, premijer govori kada mu Skupština da riječ. Ja sam to kao zastupnik govorio stalno pa sam kao premijer s ove bine nekoliko puta sišao jer vi imate tu prednost. I obično zastupnici više diskutuju i onda se nekada da riječ premijeru i Vladi i ja mislim da je to koncept koji treba ostati jer je takvo ustrojenje Kantona Sarajevo. Dakle, radeći na prijedlogu ove smjene, to je bio jedan od težih dokumenata za mene u ovih osam mjeseci, kako ga napisati da bude u okviru Zakona a da ne povrijedi ljude koji nisu radili protuustavno i protuzakonito i nisu nedostojni svoje funkcije. Dakle to je činjenica. Zakon organizacije organa uprave u FBiH član 58 i ono što ste vi usaglašavajući Poslovnik izmijenili usaglasili sa ovim zakonom, je širok. I osim ovog dijela u kojem vi govorite koji ja naravno odbijam jer je riječ o kvalitetnim i poštenim ljudima, stoji jedan dio koji kaže, ne osigurava provođenje zakona i drugih propisa i općih akata. U članu 17 Zakona o Vladi Kantona Sarajevo kaže: Premijer rukovodi radom Vlade Kantona, odgovora za njen rad, osigurava jedinstvo u izvršavanju poslova i nadležnosti Vlade Kantona Sarajevo, ostvaruje saradnju sa drugim organima i usmjerava djelovanje Vlade Kantona Sarajevo kao cjeline i članova Vlade Kantona pojedinačno, te vrši druge poslove predviđene Ustavom. Ja sam imao nekoliko opcija. Dakle novi dogovor političkih stranaka, koalicija SDA SBB na snazi nekoliko sedmica. Papir koji ste vi danas dobili, ja govorim SDA SBB na nivou država, FBiH kantoni. Dakle važeći koalicioni sporazum. Vaš papir danas, vas zastupnika u Skupštini Kantona Sarajevo 22 potpisa koja govore o tome da ja na ovaj način ne mogu osigurati rad, jedinstvo u radu ove Vlade, jedinstvo u radu parlamentarne Skupštine sa novom parlamentarnom većinom. Svi ste dugo uglavnom u klupama i znate da je ovo jedan potpuno normalan i prirodan proces. A ja sam baš htio da se ne desi ono što se u ovoj Sali dešavalo više puta, da se grubo i surovo pozovem na Ustav, time izvršim svoju zakonsku obavezu i eventualno i tom procesu povrijedim ljude koji to nisu zaslužili. Imao sam drugu opciju, parlamentarna većina bi vjerovatno podržavala odluke Vlade, koja je u kapacitetu sedam ili osam, također mogla glasati i donositi odluke i preglasavati ministre iz DF-a. Ili se odlučiti na ovaj korak koji je jedna normalna politička situacija i naravno da je logično da se opredijelimo za ovaj drugi korak. I iz toga su razlozi hitnosti. Mogli smo 12 dana provesti na način da ljudi koji znaju da odlaze još uvijek rade, raspravljaju budžet u toku je javna rasprava. Zato mislim da je bitno da ministri koji bi trebali biti novi dio, sastav Vlade unesu dio svojih politika u ono što će biti eventualno drugačije u radu njihovih ministarstava i da u tom slučaju ima veze i sa imovinom i eventualnom štetom u kantonu, ne naravno u onom obimu u kom bih ja to zloupotrijebio pa rekao to je neki nužni razlog za smjenu. To naravno nije tako. Druga stvar je što mi ponovno po nekoj političkom ustaljenom principu imamo procese koji nam stoje već nekoliko sedmica i ponovo ne greškom ljudi iz DF-a nego novim političkim dogovorom novih političkih partnera u kojima trenutno ističe v.d mandat direktorici ZZO, u kom trenutno u Kulturnom centru nemamo direktora, nema ko potpisati plate. Istiću nam Skupštine JKP; ili su istekle već, u kom su UO i NO u zdravstvu istekli. Dakle i to naravno uvijek se radi na način da to predlaže Vlada parlamentarnoj većini. Ti procesi stoje i štetni su po Kanton. Dakle to je posao koji čeka eventualno novu Vladu ukoliko je potvrdite i zbog toga se danas dešava ovakva sjednica koja je opet je moj opšti utisak mnogo civilizovanija i kvalitetnija i s puno više argumenata se razgovara nego sve one koje su do sada ovdje viđene i zato mi je drago što je to tako. Dakle još jednom, u okviru svojih nadležnosti, posebno člana 17 zakona o Vladi Kantona

Sarajevo i svojih obaveza iz ovog Zakona i Zakona o organizaciji organa uprave u FBiH, mi smo našli model. U tim dijelovima 58 člana i 17 člana stoji uporište koje nije onako kako neko pokušava to na svoj način interpretirati, ja kažem da nije tako nego se oslikava upravo u ovoj nefunkcionalnosti, nemogućnosti sprovođenja zakona odluka i drugih akata, u odnosu na formalno, faktičko stanje u Skupština Kantona Sarajevo koje ima skoro pa dvotrećinsku većinu u papiru koji je dostavljen i predsjedavajućem Skupštine i meni kao premijeru. Hvala.

Poslanik/zastupnik Predrag Kojović:

Zahvaljujem predsjedavajuća. Ja sam Kojović i onda kada zovu Kojević, to je jako blisko jednom prezimenu koje ne bih želio da budem.

Predsjedateljica:

Oprostite, oprostite.

Poslanik/zastupnik Predrag Kojović.

Hvala. Meni je iskreno da vam kažem, ja razumijem i cijenim zaista što premijer nije uradio ono što su neke druge stranke kada su uradile rekonstrukciju Vlade u Kantonu Sarajevo išle i tvrdile da određeni ministri rade protuustavno, protivzakonito da bi se postigao ovaj rezultat koji danas imamo. I ja zaista cijenim iako mislim da nisu bili svi ministri, ne zaslužuju da ih se brani. Ali premijer je u navođenju opcija koje je imao, zaboravio spomenuti još jednu opciju koja ustvari postoji svo vrijeme i u Ustavu i u zakonu o Vladi i u Poslovniku i koja je bila najlogičnija, a iz nekog razloga smo išli danas u ovu najnevjerovatniju pravnu avanturu izmjenu Poslovnika, stvaranja novih većina u komisiji da bi smo došli dovdje. A ta opcija je vrlo jednostavna. Premijer podnese ostavku, znači ostavka cijele Vlade i onda premijer isti taj ponovo Klub SDA dostavi predsjedavajućoj ime novog mandatar koji je isti mandatar koji je sada bio sa novim sastavom Vlade. Ali zašto jednostavno kada može komplikovano i uz par kako bih rekao pravnih grešaka kako je to danas. Mislim ja ne razumijem zaista zašto premijer nije iskoristio ovu mogućnost koja je predviđena i u Ustavu Kantona Sarajevo i u Zakonu o Vladi i u Poslovniku.

Poslanik/zastupnik Hamed Aljović.

Zahvaljujem predsjedavajuća. Možete li nam samo pročitati imena ovih 22 potpisana zastupnika?

Predsjedateljica:

To nije tačka dnevnog reda molim vas.

Poslanik/zastupnik Hamed Aljović:

Pa znam da nije tačka dnevnog reda ali pozivaju se na imena 22 a ne znamo ko su.

Predsjedateljica:

Molim vas ako nema više rasprave prelazimo na glasanje. Zaključujem raspravu. Ko je za? Ko je protiv? Tko je suzdržan?

Konstatujem da je Skupština donijela odluku Za je glasalo 20 poslanika protiv 9 i suzdržano 1. Konstatujem da je Skupština donijela ovu odluku.

Prelazimo na šestu tačku dnevnog reda, a ona je:

AD – 5.

PRIJEDLOG ODLUKE O POTVRĐIVANJU IMENOVANJA MINISTARA U VLADI KANTONA SARAJEVO

Prijedlog odluke ste dobili u toku sjednice. Molim Komisiju Predlagača da podnese uvodne napomene.

Poslanik/zastupnik Kemal Ademović:

Novo usvojeni odredba, Poslovnik koji smo usvojili dakle s izmjenama u članu 205b kaže sljedeće: „premijer će u slučaju donošenja odluke iz člana 205 stav IV smjene ministara dostaviti predsjedavajućem Skupštine prijedlog kandidata ministara na upražnjenu ministarsku funkciju čiji će se izbor vršiti u hitnoj proceduri sukladno članu 204 i 205 ovog Poslovnika, s tim da rok može biti kraći od roka utvrđenog članom 204 ovog poslovnika. Dakle, upravo smo donijeli odluku kao Skupština, komisija nije mogla unaprijed zasjedati o nečemu prejudicirati neka rješenja. Prvo je trebalo formalno pravno donijeti ovu odluku. Tek sada komisija može zasjedati i razmatrati i imenovati Vladu.

Predsjedateljica:

Da li vam je dovoljna pauza od 10 minuta?

Poslanik/zastupnik zastupnik Kemal Ademović:

Od 10 nije.

Predsjedateljica:

Dobro, pauza od 15 minuta. I mogu li samo trenutak jedan. Naš uvaženi ministar Rešidat je imao potrebu nešto da kaže. Hvala lijepo.

Gospodin Samer Rešidat:

Ja vam se zahvaljujem, ispravka krivog navoda, bivši ministar. Uvažena predsjedavajuća, članovi Vlade, premijeru, članovi Skupštine ja sam uzeo ovih par minuta samo da vam se zahvalim u ime ministara DF-a koji su proteklih 8 mjeseci obnašali funkciju ministara u Vladi Kantona Sarajevo. Evo kao što je i premijer rekao nismo kršili Zakon, nismo ne mogu se sada sjetiti one druge riječi, jeste zbog čega smo smijenjeni, jasno nam je zbog toga što je formirana nova skupštinska većina. Da ne nabrajam bojim se da neku stranku ne zaboravim pošto ih ima više nego u prošlom sazivu. Ono što će ministri DF-a i zastupnici u Skupštini i dalje raditi je da će biti konstruktivna opozicija da će podržavati sve reforme. Drago mi je što je nova koaliciona većina u svom onome ekspozeu ustvari u Agendi navela skoro pa iste stvari za šta smo i mi govorili i drago mi je što ću uskoro ja kao građanin grada Sarajeva dobiti sve ono što su nabrojali. U proljeće, početak gradnje južne i sjeverne longitudinalne, transferzale, toplovođe iz Kaknja tih 56 km ja očekujem po najavi da krene izgradnju negdje u martu mjesecu ili u aprilu u proljeće i da će Sarajevo ono što zaslužuje biti metropola. Mi kao opozicija nećemo brojati dane kao što su brojali nama, budućim ministrima koji će zauzeti naša mjesta želim svu sreću u radu i bilo koja pomoć bude potrebna mi smo tu. Njihova je sreća što neće imati medijski pritisak kao što smo ga imali mi ali bože moj eto otklonili smo te neke početne probleme. Tako da mi je jako drago i podržavat ću svaki vaš korak koji budete pravili naprijed prema onim ciljevima koji su bili zajednički a to je da Sarajevo napokon postane metropola. Još bih samo dodao na premijerovo izlaganje kojim se zahvaljujemo, mi ministri DF-a na fer i korektnoj saradnji u proteklih osam mjeseci da nikada nije bilo preglasavanja u Vladi, tako da ne znam što bi to bilo i u budućnosti, dakle da Vlada radi jedinstveno sa svim ovim ministrima koji će biti danas imenovani.

Predsjedateljica:

Hvala. Znači pauza 15 minuta.

NASTAVAK NAKON PAUZA

Predsjedateljica:

Molim službu da prebroji imamo li sve zastupnike u Sali? Možemo početi. Evo mi smo na tački broj 6.

Molim predlagača da podnese uvodne napomene, zastupnik Kemal Ademović predsjednik Komisije za izbor i imenovanja, izvolite.

Poslanik/zastupnik Kemal Ademović.

Hvala vam. U skladu sa članovima Poslovnika 37, 204, 205 b Komisija je održala hitnu sjednicu na zahtjev predsjedavajućeg Skupštine Kantona Sarajevo i razmotrila i donijela odluku o potvrđivanju imenovanja ministara u Vladi Kantona Sarajevo na obrazloženi prijedlog premijera Vlade Kantona Sarajevo, donijela je sljedeću odluku. Potvrđuje se imenovanje ministara u Vladi Kantona Sarajevo u sastavu:

1. Mario Nenadić Ministarstvo pravde i uprave
2. Zilha Ademaj Ministarstvo zdravstva
3. Mirvad Kurić Ministarstvo kulture i sporta
4. Amela Dautbegović Ministarstvo za rad, socijalnu politiku, raseljena lica i izbjeglice
5. Ismir Jusko Ministarstvo unutrašnjih poslova.

Komisija je također donijela prijedlog istovjetne odluke koju bi trebalo da potvrdi Skupština, odluke o potvrđivanju imenovanja ministara u Vladi Kantona koju donosi Skupština. Toliko, ukoliko ima pitanja ja ću pokušati da odgovorim.

Predsjedateljica:

Ima li pitanja?

Poslanik/zastupnik Mirsad Pindžo:

Hvala uvažena predsjedavajuća. Nemam pitanje za predsjedavajućeg Komisije nego imam pitanje obzirom da je na dnevnom redu odluka o potvrđivanju Vlade Kantona Sarajevo maloprije je neko od kolega tražio da se čita spisak potpisa ja to ne tražim, ali bi dobro bilo zbog javnosti, javnost i građani Kantona Sarajevo imaju pravo da znaju ko danas preuzima odgovornost za stanje u Kantonu Sarajevo odnosno ko čini novu parlamentarnu većinu u Kantonu Sarajevo. Mislim da bi bilo korektno da se to kaže iako ne mora naravno, nije čitanje potpisivanje mi ne treba, ali mislim da bi bilo korektno da zbog javnosti, zbog građana kažemo ko je taj ko preuzima danas odgovornost za stanje u Kantonu Sarajevo. Kada je u pitanju odluka, samo još jednu rečenicu, da se ne bih javljao kasnije, prijedlog premijera za imenovanje ministara moj lični stav nemam apsolutno ni jednu zamjerku ni na bilo kojeg kandidata, neke od ovih ljudi znam i lično. Zbog procedura i političke situacije u kojoj jesmo nećemo moći podržati njihov izbor i bit ćemo suzdržani tokom glasanja. I da to ne shvate kao lično zato što nemamo apsolutno ni jednu zamjerku, ja bar nemam ni jednu zamjerku na bilo koje predloženo ime i njihovu biografiju.

Predsjedateljica:

Hvala gospodine Pindžo. Ima li još pitanja? Otvaram raspravu.

Poslanik/zastupnik Predrag Kojović:

Zahvaljujem. Ja bih samo vrlo kratko obrazložio način na koji ćemo mi glasati. Odnosno razloge zbog kojih ćemo glasati kako ćemo glasati. Pokušavam sada nekako da to najjednostavnije što brže završimo. Mi smatramo da je situacija u kojoj se nalazi BiH danas težak ekonomski politički socijalni položaj naših građana direktan rezultat dominantnog učešća SDA u izvršnoj vlasti organa BIH od rata do danas i sve Vlade u kojima su oni dominantni većina, smatramo SDA vladama i uvijek glasamo protiv toga. Tako bih molio da kao što kaže kolega Pindžo naš glas bude upravo tako prepoznat a ne kao na neki način pojedinačno izjašnjavanje o kvalitetama predloženih ministara. Hvala.

Premijer Elmedin Konaković:

Ja sam opet čekao da mi date riječ i tako treba. Po tom istom članu 17. o radu Vlade ja sam odgovoran, rukovodim radom Vlade, odgovoran sam za njen rad. Bilo bi neozbiljno da na prvoj tački nisam govorio o ministrima DF-a i bilo bi neozbiljno naravno da ja ne predstavim ministre SBB-a. Dakle pet ministara SBB. To je možda dijelom odgovor na ovo političko pitanje iako sam se ja usrećio kada sam mogao sa ove govornice reći to je vaša ta politička borba ja sam izvršna vlast. Nemam baš puno dodirnih tačaka s tim, ne u ovoj funkciji. Dakle dobili ste prijedloge, CV kandidata koji zadovoljavaju ovu praksu uobičajenu i nacionalnu strukturu i džender. I kratko za Ministarstvo pravde i uprave predložen je pravnik Mario Nenadić, za Ministarstvo zdravstva ekonomista Zilha Ademaj, za Ministarstvo kulture i sporta Mirvad Kurić koji je završio Akademiju dramskih umjetnosti, ministrica za rad socijalnu politiku, izbjegla i raseljena lica Amela Dautbegović također pravnik, Ismir Jusko, fakultet sporta i tjelesnog odgoja, magistar, pohađa doktorski studij. Dakle sve zakonske procedure, ustavne procedure su zadovoljene i time je to danas konačan i finalan prijedlog premijera koji je prošao procedure za novi sastav Vlade Kantona Sarajevo. Hvala vam.

Predsjedateljica:

MOLIM POSLANIKE DA PRISTUPE IZJAŠNJAVANJU O PRIJEDLOGU NAVEDENE ODLUKE.

Tko je za? Tko je protiv? Tko je suzdržan?

ZA JE GLASALO 21 POSLANIKA, PROTIV 2 i SUZDRŽANO 6.

KONSTATUJEM DA JE SKUPŠTINA DONIJELA ODLUKU, te pristupamo Svečanoj izjavi i davanju Svečane zakletve.

Svečano izjavljujem da ću povjerenu dužnost obavljati savjesno, pridržavati se Ustava i zakona Bosne i Hercegovine, Federacije Bosne i Hercegovine i Kantona Sarajevo, zalagati se za ljudska prava i slobode i da ću u svim prilikama štiti interese Bosne i Hercegovine, Federacije Bosne i Hercegovine i Kantona Sarajevo i ravnopravnost naroda i građana koji u njima žive. Čestitam.

/Uslijedilo je čestitanje novim ministrima/

Predsjedateljica:

Evo ja još jednom čestitam našim novim ministrima. Molim samo za malo pažnje molim vas. Čestitam našim novim ministrima i želim im puno sreće u radu. Pošto smo iscrpili sve tačke Dnevnog reda današnje sjednice ja je sada zvanično zaključujem. Hvala lijepo.

